

定宗嗣立

当太宗之崩，皇后脱列哥那称制。时，亲王斡赤斤忽以兵至，人心震骇。斡赤斤有子随太宗居和林，后亟遣往究诘。其时，西北军凯旋，定宗以至叶密尔河，斡赤斤闻之，乃曰：「吾来视丧，非有他也。」遂引兵归。定宗既至，后欲立为帝，待拔都来会议，而拔都托病屡愆行期，不及待，乃集诸王，诸延立定宗，斡赤斤亦来会。

丙午七月，定宗即位。边远属国，若俄罗斯、若罗姆、若角儿只、若法而斯、若克儿漫、若毛夕耳等，或自来朝、或遣子弟，其以使臣陪位襄事者，则有天主教王、报答哈里发、木刺夷。阿勒颇各酋长。数月之内，王会之盛，先所未有。定宗锡赉优厚，妃主、亲王、大臣并其子弟，皆有赐。诸翼将士，赐及其家。朝贡诸国，犒及从者。皆拖雷妃唆鲁禾帖尼主其事。定宗首究斡赤斤称兵之事，而不显言。令亲王蒙哥鄂尔达往按，戮其官属数人，余置不问。

当太后之摄国也，法令废弛，诸王征求无艺，属官因缘为奸，至是始申禁，拖雷妃及子独不效尤。故定宗礼重之，杀阿不都拉蛮，仍以牙刺挖赤主赋财，其子马思忽惕治突而基斯单、撒马尔干等地，皆锡金狮符。

先是，太后不悦镇海，罢之。至是，复以镇海为相。谕报答使人法克哀丁归告其主，遇蒙古人无礼，将致兵祸。木刺夷使人不见礼而遣归。

察合台后太宗数月即薨。薨后，其孙合剌旭烈监国。定宗以传孙而不传子为非。令察合台子也速蒙哥嗣位，遣兵征高丽。遣察罕伐宋。命也里知吉带征西域。于诸王部兵十中抽一，西域属邦罗姆、角儿只、毛夕耳、的牙佩壳耳、阿勒颇皆辖之，取贡赋以供用。

三年戊申，以疾西巡叶密尔河，为潜邸时汤沐地，沿路犒赏无算。拖雷妃唆

鲁禾帖尼以定宗与拔都有隙，今且西行，使告拔都，宜善自备。拔都乃东来迓之，

定宗在途，西距别失八里七日程，病作而崩，寿四十二。

定宗严重有威，在位未久，不及设施。惟皇后听政时，君权下替。定宗既立，乾纲复归于上。手足有拘挛，好酒色。常以疾不视事，事多决于大臣镇海、喀达克二人。